


葉庭庵先生年譜

28

28



遜菴十八歲攝影



影攝歲九十三菴遐



影攝歲八十五菴遐



遐翁六十六歲攝影

序

民國十九年庚午爲番禺葉遐菴先生五十攬揆之辰門人故吏曾有遐菴彙稿之刊印以壽先生越十歲先生花甲之年同人有彙稿二輯之發起顧以抗戰軍興未遑剗劘勝利以還同人先後東歸者過滬必趨謁先生先生欣然爲道其數年來堅卓不屈之經過並出示其感懷近作而先生今年已六十六矣同人於彙稿二輯旣已付印茲復將一二兩輯與先生年譜合刊一帙以餉當世竊思先生四十餘年來政事學術文章爲中外所景仰而其事功之獨著於當時而垂於久遠者則以交通建設最關重大我國近代交通肇始於清末而發展於民初先生於此時期歷職郎署數長交通於專門學術無所不窺尤熟於民生情故與國際措施得失之林故凡所擘劃皆窺前人未有之成規定今後百年之大計人以其出處卜交通四政之興衰而先生獨慨然於樹人之不可以緩求才若渴舉賢如恐不及試讀彙稿各編論其文章泰半皆四十年來交通史料衡其事實則舉前人所不能爲不敢爲者先生盱衡時會知其不可爲而爲之先生秉性剛毅不能和光同塵益以當時橫政之所出不能安其職行其志僅僅伺隙乘時以求實施其一二復性不諧俗致退處於江湖寂寞之區者十有餘年然今日國家之所取法後起之所秉承皆不出乎先生所手創之宏規與所倡導之風氣先生之成就自不以在位與否而差其毫末也鴻勛自海外負笈歸來卽受知

於先生厥後出任路工掌教交通大學完成粵漢鐵路先生以在野之身而時時左右之督責之鴻勛愧於先生政事文章未能窺見步趨其萬一茲幸邦家再造得重親先生顏色並幸得預於刊印茲編之役所以壽先生者當爲先生之所許抑亦海內人士仰止先生者所同以先睹爲快者歟是則非止鴻勛一人之私幸也已足爲序

中華民國三十五年十月門人凌鴻勛拜序

序

建國大業非一時所能集亦非一人所能任自來謀國者立百年之大計樹異代之風聲在廷則扶持善類在野則講學鄉閭如清初之亭林船山清末之湘鄉南皮諸先生莫不汲汲以宏獎後進爲樹人之圖故有清一代人文之盛媲美宋唐民國以還干戈俶擾無寧歲稱兵者日事割據之不遑寧有計及建國之業者獨我葉公遐菴夫子天挺人豪遠蹠高掌盱衡大局怒焉憂之深知非實業不足以救危亡非交通不足以拓實業時方從事路政慨然以發展全國鐵路爲己任而鑑于歐美各國交通技術日異月新非廣儲人才不足以資觀摩而期發展於是迭次公開登報徵求專門人才國內有志之士靡然從風負笈公門初民國三年鎮遠畢業唐山工學院奉派往川漢路實習適歐戰發生國內興建全數停頓爰改就揚子江修復宜渝灘險工程處主任工程司水漲時並兼任川輪大副忽忽三載仍無進入鐵路之機會忽接公通令凡交大畢業願來鐵路工作者速來報到准予派往各路實習乃捨灘險工程處而赴部投效時鐵路實習薪資甚微工程處則數倍於此聞者多嗤之不顧也殆赴京奉實習二年餘深以爲故步自封難裨實用爰有梯航遠遊之志顧鎮遠家寒素何能任此適公又公開徵求專門人才凡國內外大學畢業有志鐵路者咸來報到從優錄用聞風而往者不可勝計於此可見公之培植人才不遺餘力是時也鎮遠與公無一面之謁一言之介將何以自效繼思公賢者也或當不致見摺當時以京奉鐵路實習生之名冒然請求公卽令傳見允送出洋實習一科爲期二年復求實習四年卽蒙許准可見公培植人才之心甚切凡求上進者無不予以援手也鎮遠在美實習號誌年餘深感吾國鐵路號誌缺乏乃

作詳細計劃呈部蒙公分送各路研究隨卽傳令嘉獎鼓勵人才無微不至既畢業康乃爾大學復轉輾實習於各地鐵路公司會公再長交通重申徵求專門人才之命鎮遠上書請求赴歐美各國考察公立允其請民十七南京建設委員會成立公命參加未幾隨張靜江先生來杭籌劃杭江鐵路工程時公方居滬上鎮遠每過滬必造廬請益當時杭路工程費鉅款絀籌措維艱然卒能以極少之款項與極少之人力於短期內完成者固靜江先生主持於上而一切設計公實有以啓迪之也民三十鎮遠爲滇緬材料再度赴美拜公於香港寓次諄諄告以病中不克參加抗戰工作囑效忠黨國爲民族爭存亡而於儲才之義尤再三致意焉鎮遠無似未能有所建樹惟時惕冰淵深懼有玷師門故服務三十年幸免覆餗者凜公教也抗戰前後交通界方感人才之奇缺幸公有先見之明勇於培植後進乃有今日之果否則更不堪設想矣公素主交通救國桃李遍國中胥卓然於交通事業有以樹立實受師門涵煦之化是知賢者之業於政則羣衆直接被其澤在野則羣衆間接蒙其利其所裨于國者一也今年秋公之年譜告成同人督序於鎮遠聞命之餘懼不敢承實以夫子之言豈游夏所敢贊一辭繼而思之公之政事文章多具此冊而百年樹人之深心尤當爲後人所矜式今以識於公者推論昔賢以人事君之義以爲後之綢繆國是者告俾知所取法抑亦及門之責也故謹濡筆以述所懷焉

中華民國三十五年門人江北杜鎮遠拜撰

凡例

一、先生道濟當世而不自居施及將來而不自伐其視名位功業猶浮雲之過乎其前曾不以有無置諸胸臆特其數十年來之所踐履關係於我國交通政治經濟文化之演進至鉅故同人等爲編年譜以備史乘之蒐採並供國人之參攷非先生姝姝焉自悅其故迹也

二、本書分年編纂標題一事爲綱其事詳見於目不必詳者從略

三、某年某事知其月日者並記某月某日不知者從略

四、論世然後知人本書雖不能詳記國事然先生始自末僚洊參大政數歷中外凡數十年所經變故甚多無在不與生平志業有關故本書於國事亦分別附記

五、本書所錄先生詩文或他人所著皆以表襮當日事實及先生之意旨其他文字過繁未及備錄茲均分別附注引見原書以備參攷

六、本書雖分年記事然某一事有前後關聯延長若干年或其中演變不能確記在某年份者分年記述反不易明瞭故間於某標題下原始要終連類敘及

七、先生平生措注往往勤遠謀而收實效此編於其發端在前而收效甚遠者或當時羣疑衆謗而所全實大者不敢或忽儻因事機不順阻力橫生而未獲申其志者仍據事直書不雜私毫恩怨之見以期取信而俟公評

八、先生平生行誼雖與交通暨文化事業相終始然數十年中關於政治外交民生經濟財政教育諸

大端尤多主持盈虛消息動繫國家存亡允匪細故本書采摭所及難免疏漏深望先生親知故舊以及海內人士不吝賜教惠予指示俾資增補他日或更纂成別錄與此書相輔而行不勝企幸

九、此書經始于民國二十五年中經十餘人之纂輯始勉強成書其搜集資料剪裁貫串以迄編次校對迭荷同人努力復以各方資助方克印行併此志謝

中華民國三十五年八月遐庵

年譜彙稿

編印會謹識

先君仲鸞公家傳

恭綽謹撰

先君諱佩瑋字雲坡號仲鸞籍廣東番禺人原籍浙江餘姚高祖楓溪公墓游粵中遂家焉曾祖簡堂公潛德不耀祖蓮裳公以文學名世著有斜月杏花屋詩鈔花影吹笙詞綠莊嚴館隨筆諸書父南雪公咸豐壬子科舉人丙辰進士翰林院庶吉士戶部江西司主事貴州司員外郎雲南司郎中軍機章京少師陳蘭甫先生以金石書畫文藝倡導後進凡數十年一時嚮彥如潘伯寅張孝達景劍泉吳清卿譚仲脩樊雲門張公東汪芙生廖澤羣金芭堂皆交契至深復喜獎掖後進如盛伯希周蒼生于晦若梁星海易實甫文道希康長素諸君皆爲忘年交晚主講越華書院成材尤衆先君濡染家學少卽勤講貫勵志節南雪公歸里先君居京師賣文自給先伯伯蘧公負債多無以償先君授徒趙氏月束脩四金以二金爲先伯償逋二金供薪水久之債主不復再索旋佐孫子授先生直隸學幕孫先生清勤素著府君爲襄校試卷兼司簡牘隨軺周歷各屬車中搆腹稿入逆旅繕發以爲常子授先生大賞之介入山東巡撫張勤果公墓府時張公方會辦北洋海軍復從事河工先君昕夕爲治官書及圖說先君素習中外算法多所糾繩勤果因悉以委之每夕率盡三燭方休書成勤果委司鹿邑鹽務旋應光緒戊子科順天鄉試中式舉人以河工勞勩由同知保升以知府候補分發江西當道重其品學累令筦權政十餘年間曾歷瑞洪河口涂家埠神岡山諸地先君務恤商困不肯爲一切之行故官課恆短私況亦益困更不得一任實職辛亥政變遂不再仕恭綽奉養京邸凡四年餘民國五年以先兄道繩逝世感傷觸發痰喘舊疾以五月二十三日卒于天津時年六十四以先君宦贛久夙有朱邑桐鄉之意因奉葬于新建縣龍潭之桃花山

先妣汪夫人餘杭文端公諱元方之女先府君九年卒至是合窆焉府君先四十無子因承祖命以恭綽爲嗣後生子恭徽妾簡氏出女四長適四川王以桐次適浙江盧宗孚三適廣西關祖光四適福建黃禎祥皆簡氏出五未字江氏出先君寬和豁達能自刻苦其律身教人恆以行己有恥及事無不可對人言二者爲大閑少劬于學至老不衰故詩文篆隸以迄聲音訓詁性理歷史掌故歷算之學靡不精究恭綽少時猶見算草盈數篋尤邃于幾何圓錐曲線諸學意欲求制器尙象之原故坊間機械學之新譯本靡不窮覽顧不肯有所述作曰立言非易事一不慎則貽患無窮故終身不著書先伯伯蘧公本生父叔達公皆先卒先君教養諸孤一如親生適徐氏姑母早寡先君視甥紹槃如己出以迄成立此皆言之較大者其他瑣屑不具書

蘭臺公值樞垣以與當道不洽請疾歸是年夏回粵叔達公俞太夫人偕先生昆仲從焉蘭臺公爲陳蘭甫先生澧入室弟子回粵後主講越華書院性高潔不與當道往還歷任督撫將軍爲同年張之洞譚鍾麟及倪文蔚長善又彭玉麟至粵皆致敬禮並相唱和著籍門弟子先後數千人知名之士半出其門

光緒九年癸未（一八八三）先生三歲

始蘭臺公南歸仲鸞公以疾未從留居京邸傭書自給旋授讀于趙氏月俸四金以二金助伯兄還債以二金自贍知者以爲難能

光緒十年甲申（一八八四）先生四歲

四月廿一日俞太夫人棄世年三十俞太夫人安徽徽州府婺源縣籍考曰政公刑部湖廣司廣西司主事妣章太恭人兄炳輝光緒庚辰科進士刑部主事終廣東廉州府知府

光緒十一年乙酉（一八八五）先生五歲

是年蘭臺公爲之啓蒙始讀四書叔達公自訓之

仲鸞公入順天學政孫公詒經幕爲襄校試卷兼司文牘隨同按試每于車中構思至旅次伸紙疾書勞瘁不辭孫公欽其品績命與公子爲友卽慕韓先生寶琦也

光緒十一年丙戌（一八八六）先生六歲

夏病痧垂危二閱月始愈

是年習造句及屬對

光緒十三年丁亥（一八八七）先生七歲

叔達公命賦春雨詩得句云幾晚無明月輕陰正釀春公喜其有思致特賞之

是年仲鸞公入山東巡撫張勤果公曜幕府任纂海防圖說晝夜從事率夕盡二燭爲常時湯蟄仙先生

壽潛同在幕府與仲鸞公交甚篤曾相約歸隱山陰焉

就學於表兄任穆臣先生世杰家先後同學爲胡清瑞衍鶚展堂衍鴻昆季曹伯陶受坤詹戟垣功榮金

奉璜紹年王少鶴口口諸君又兄道生及弟懿卿恭彝同就學

任穆臣先生爲番禺名諸生淹貫經史百家貧居奉母不求聞達僅一子早卒無後

光緒十四年戊子（一八八八）先生八歲

仍從穆臣先生讀

是年仲鸞公中式順天鄉試舉人

光緒十五年己丑（一八八九）先生九歲

仍從穆臣先生讀

光緒十六年庚寅（一八九零）先生十歲

從柳鏡芙先生龍驤讀柳先生爲祖妣柳太夫人族孫兼通醫術

是年仲鸞公携眷回粵謁祖庶母簡氏來歸

光緒十七年辛卯（一八九一）先生十一歲

蘭臺公命承嗣仲鸞公爲子先是仲鸞公回粵見先生賦性沉默不與羣兒嬉特賞之謂爲可成大器汪太夫人尤鍾愛至是請於蘭臺公取以爲嗣時庶弟恭徽猶未生也

光緒十八年壬辰（一八九二）先生十二歲

二月從仲鸞公北上會試寓北京官菜園上街仲鸞公自授之讀攜謁姨丈濟寧孫文恪公毓汝志文貞公銳及諸親好咸賞許焉王緯辰得庚初晤以其名屬先生對先生應聲答以公輸子王驚賞不已由粵赴滬時在輪船上見設攤售物者先生以堂上所給錢購不急之物詢其故先生謂以其攤無人顧問憂形於色故特購其物以濟之仲鸞公以先生能濟人之急尤致獎慰焉先生慈惠根于性生蓋如此是年仲鸞公會試不第以知府分發江西先生從侍

是年隨仲鸞公于鄱陽之瑞洪鎮從香山楊藹樓先生讀習八股始成篇仲鸞公命閱資治通鑑及史記前後漢書暨歷代名臣言行錄明儒學案諸書

時文道希先生廷式家富藏書文先生故敬事蘭臺公並與仲鸞公善至是命與其子公達永譽爲友且許縱覽所藏文先生湛深史地掌故之學先生切磋濡染因亦有志于是焉

光緒十九年癸巳（一八九三）先生十三歲

是年秋歸南昌

從鄱陽張香崖先生讀

先生歸南昌後識梅韻雲光義裴猗光遠昆季及劉未霖鳳起玉衡鳳鏘昆季蔡公湛可權王浩彝口口

諸君

光緒二十年甲午（一八九四）先生十四歲

從新建程菊圃先生讀

先生私淑皮鹿門先生喜爲駢文詩詞恆代人應經訓書院課故有人誤以先生爲皮弟子先生嘗以小啓向文公達乞葡萄酒文先生道希大賞之

是年識楊昀谷增 歐陽竟無漸 桂伯華 赤夏劍丞 敬觀沈小沂兆 社諸眞長宗元

時先生溺苦于學務閱覽仲鸞公爲多購典籍先生復縱觀文道希先生及友人梅蔡諸家藏書日率以十冊爲常時已有志著述擬爲淮南子集解及駢體文鈔注

光緒廿一年乙未（一八九五）先生十五歲

從安福鄒建甫先生鼎讀鄒先生有味新山館詩集一卷行世先生所校刊也

南雪公以先生學業孟晉寄珮玉獎之曰願其比德于玉也先生別署比德堂以此

從牛島吉郎習日文時新機初啓長江流域競爲新學先生與江右諸青年亦奮起爲開學堂譯印新籍諸事

是年始識陳師曾衡恪

作詠蠶詩云衣被滿天下誰能識其恩一朝功成去飄然遺蛻存作繭忘軀命辛勞冀少功絲絲雖自縛未是可憐蟲說者謂此二詩足括先生一生志事云